

20
25

bangor.ac.uk



PRIFYSGOL
BANGOR
UNIVERSITY

**Dathliadau
Graddio**
Dosbarth 2025

A man with a beard and glasses, wearing a dark blue suit and a blue and yellow striped tie, stands with his hands clasped in front of a large, historic stone building. The building has multiple windows and a classic architectural style. A semi-transparent grey diagonal bar is overlaid on the left side of the image, containing the text.

**Croeso gan yr
Is-Ganghellor
Llongyfarchiadau!**



Twf a Thrawsnewid

Mae graddio yn garreg filltir arwyddocaol ym mywyd pob myfyriwr a heddiw mae'n bleser mawr gennym ddathlu eich llwyddiannau yma ym Mhrifysgol Bangor!

Mae eich profiad prifysgol wedi mynd â chi ar daith o dwf a thrawsnewid. Hoffwn dalu teyrnged arbennig i chi am eich ymrwymiad a'ch ymroddiad i ddysgu.

Graddio yw'r dyddiad pwysicaf yn y calendr addysg uwch. Fel Is-Ganghellor, mae'n bleser mawr gennyf fod yn bresennol yn y seremonïau hyn, yn tystio i'ch llwyddiant a dathlu grym trawsnewidiol addysg brifysgol. Rydym yn falch iawn o allu rhannu dathliadau ein holl raddedigion gyda theuluoedd, ffrindiau a chefnogwyr.

Pa bynnag lwybr a ddewiswch, mae'r brifysgol yn dymuno'n dda i chi ar gyfer y dyfodol, ac yn gwneud hynny gan wybod bod Bangor wedi'ch helpu i ehangu eich meddwl a'ch doniau, gan roi'r wybodaeth, y profiadau a'r rhwydweithiau i chi i'ch cynorthwyo wrth i chi lywio'r camau nesaf yn eich bywyd.

Cofiwch y bydd eich cysylltiad â Phrifysgol Bangor yn para am oes. Rydych yn awr yn rhan o'n cymuned ryngwladol, llwyddiannus o gyn-fyfyrwyr a byddwn yn ymdrechu i barhau i'ch cefnogi, lle bynnag yr ydych yn y byd. Ar ran staff y brifysgol, dymunaf bob llwyddiant i chi wrth gyflawni eich amcanion.

**Yr Athro Edmund Burke
Is-Ganghellor**

Prifysgol Bangor:

Y Gorffennol,

Y Presennol a'r Dyfodol

Pan agorwyd y coleg, cofrestrwyd 58 o fyfyrwyr ar gyrsiau yn amrywio o Roeg, Lladin, Cymraeg a Saesneg i Gemeg, Mathemateg, Botaneg ac Amaethyddiaeth. Wrth i adrannau a phynciau newydd gael eu sefydlu, cynyddodd nifer y myfyrwyr i tua 300 erbyn troad yr 20fed ganrif. Bu twf mawr yn y 1950au a'r 1960au, a heddiw mae dros 11,000 o fyfyrwyr yn astudio yma.

Heddiw mae ein hymchwil sydd gyda'r gorau yn y byd yn chwilio am atebion i rai o broblemau mwyaf heriol cymdeithas – o wella iechyd a lles a diogelu'r amgylchedd i ddarganfod atebion ynni carbon isel a darparu atebion newydd i hyrwyddo'r economi 5G byd-eang.

Mae ein haddysgu wedi ei seilio ar ymchwil wreiddiol mewn llawer o'n disgyblaethau. Gall myfyrwyr gael eu haddysgu gan staff academaidd sy'n arweinyddwyr ymchwil mewn meysydd mor amrywiol â gofal iechyd a gwyddorau meddygol, gwyddorau'r amgylchedd, busnes a cherddoriaeth.

1884-1903



1884

Wedi'i hariannu'n rhannol gan chwarelwyr a ffermwyr, agorodd Prifysgol Bangor ei drysau am y tro cyntaf ar 18 Hydref 1884, wedi'i lleoli yn hen dafarn y goets fawr, y Penrhyn Arms.

1893

Daeth Prifysgol Cymru Bangor yn un o dri choleg cyfansoddol gwreiddiol Prifysgol Cymru.

1903

Rhoddodd Dinas Bangor safle 10 erw ym Mhenrallt uwchben y ddinas ar gyfer adeilad newydd i'r coleg, a chasglwyd swm sylweddol o arian gan bobl leol tuag at y gost o'i adeiladu.

1907-1939

1907

Gosodwyd carreg sylfaen safle presennol Prif Adeilad y Celfyddydau gan Edward VII ar 9 Gorffennaf 1907.

1911

Agoriad swyddogol Prif Adeilad y Celfyddydau, a adeiladwyd gan Henry T. Hare, pensaer o Lundain; ynghyd â rhai o adeiladau'r celfyddydau a gwyddorau cymdeithas a rhan o'r llyfrgell.

1926

Symudodd adrannau gwyddoniaeth y Brifysgol i adeiladau newydd a phwrpasol a adeiladwyd â chymorth arian a godwyd gan Gyngor Cofeb Arwyr Gogledd Cymru, a fu hefyd yn goruchwilio'r gwaith o adeiladu'r Porth Coffa (oddi ar Ffordd Deiniol) ym 1923, i gofio'r rhai o Ogledd Cymru a gollodd eu bywydau yn y rhyfel.

1939

Ar 23 Awst 1939, wythnos cyn dechrau'r Ail Ryfel Byd, dechreuodd yr Oriel Genedlaethol yn Llundain gludo'r gweithiau celf mwyaf gwerthfawr i Fangor, gan fod pryder y byddai bomiau'n cael eu gollwng ar Lundain. Cafodd mwy na 500 o baentiadau, gan gynnwys gweithiau gan Botticelli, Rubens a Rembrandt, eu storio yn y brifysgol yn Neuadd Prichard-Jones.



1949

Ar 28 Ebrill 1949, dyfarnwyd Doethuriaeth er Anrhydedd mewn Cerddoriaeth i'w Mawrhydi'r Frenhines Elizabeth II, neu Ei Mawrhydi'r Dywysoges Elizabeth fel yr oedd ar y pryd, gan ei Fawrhydi'r Tywysog Philip, oedd newydd gael ei wneud yn Ganghellor y Brifysgol.

1952

Sefydlwyd y corff Gwirfoddoli Myfyrwyr Bangor, sef cangen wirfoddoli Undeb y Myfyrwyr, sy'n cefnogi projectau cymunedol yn ardal Bangor a'r cyffiniau.

1960au

Roedd y Brifysgol yn rhan o'r ehangu cyffredinol mewn addysg uwch yn y DU yn dilyn Adroddiad Robbins, gyda nifer o adrannau newydd ac adeiladau newydd.

1967

Ymwelodd y Beatles â'r Coleg Normal, ar gyfer y ddarlith ar Fyfyrdod Trosgynnol gan y Maharishi Mahesh Yogi. Bu'r ymweliad yn ddyddiad hollbwysig yn hanes y grŵp, gan mai yma yr oeddent pan ddaeth y newyddion am farwolaeth eu rheolwr, Brian Epstein.

1970au

Roedd protestiadau myfyrwyr yn y 1970au yn canolbwyntio ar alwadau i ehangu swyddogaeth y Gymraeg. Yn sgil ymgyrch yn erbyn polisi iaith y coleg gan Gymdeithas y Cymric, paentiwyd sloganau yn Gymraeg ar waliau'r Prif Adeilad, gan arwain at nifer o fyfyrwyr yn cael eu hatal o'u hastudiaethau.

1974

Arweiniodd y protestiadau a diarddel myfyrwyr at sefydlu Undeb Myfyrwyr Colegau Bangor (UMCB). Sefydlwyd Neuadd Gymraeg i fyfyrwyr y Brifysgol, sef Neuadd John Morris-Jones.

1977

Cwblhawyd y broses o uno'r Brifysgol gyda Choleg y Santes Fair.

1996

Cwblhawyd y broses o uno'r Brifysgol gyda'r Coleg Normal.

2003

Lansiwyd Storm FM, gorsaf radio swyddogol myfyrwyr Prifysgol Bangor, gan ddechrau darlledu ym mis Mawrth 2003.

2007

Dechreuodd y Brifysgol ar y broses o newid ei henw i Brifysgol Bangor, gan gynnwys rhoi pwerau dyfarnu graddau i Brifysgol Bangor ei hun.

2014

Llofnodwyd cytundeb gan Brifysgol Bangor i greu coleg newydd yn Tsieina; Coleg Bangor yn Tsieina (BCC).

2015

Agorwyd Pontio, y Ganolfan Celfyddydau ac Arloesi, gyda thua 1000 o bobl yn mwynhau Diwrnod Croeso yn y ganolfan.

2018

Cwblhawyd M-SParc, parc gwyddoniaeth pwrpasol cyntaf Cymru gwerth £20m sy'n eiddo i'r Brifysgol ar Ynys Môn.

2021

Prifysgol Bangor yn dathlu 100 mlynedd o gerddoriaeth gyda rhaglen flwyddyn o hyd o ddigwyddiadau, yn nodi 100 mlynedd ers penodi'r cyfansoddwr E.T. Davies yn Gyfarwyddwr Cerdd llawn- amser cyntaf y brifysgol.

2022

Mae Fframwaith Rhagoriaeth Ymchwil Llywodraeth y DU yn gosod Bangor yn y 30 Uchaf trwy'r Deyrnas Unedig am effaith gymdeithasol ei hymchwil. Ystyrir bod 85% o'n hymchwil gyda'r gorau yn y byd neu'n rhagorol yn rhyngwladol.

2023

Sefydlu Ysgol Feddygol Gogledd Cymru newydd gyda chefnogaeth Llywodraeth Cymru ac mewn partneriaeth â Bwrdd Iechyd Prifysgol Betsi Cadwaladr.

2024


Prifysgol Bangor yn dathlu 140 mlynedd.

Persbectif Unigryw

Mae Prif Adeilad y Celfyddydau ym Mhrifysgol Bangor yn parhau i fod yn ganolbwynt i'r Brifysgol a chafodd ei ddisgrifio gan Cadw, gwasanaeth amgylchedd hanesyddol Llywodraeth Cymru, 'yn bensaernïol yn un o adeiladau cyhoeddus mwyaf arwyddocaol y cyfnod ym Mhrydain'.

Adeiladwyd rhwng 1907-11 gan Henry T. Hare, a ddewiswyd yn dilyn cystadleuaeth bensaernïol a gynhaliwyd gan y Brifysgol, ar ôl caffael y safle ym 1903. Gosodwyd y garreg sylfaen gan Edward VII ar 9 Gorffennaf 1907, a chynhaliwyd yr agoriad swyddogol ar 14 Mehefin 1911.

Mae'r adeilad mewn arddull 'Tuduraidd Golegol' ac mae wedi'i seilio ar brifysgolion Rhydychen, Caergrawnt a Durham, gyda dylanwadau'r mudiad Celf a Chrefft. Mae'r adeilad wedi ei ddylunio o amgylch dau gwadrangl: y Prif Gwadrangl a'r Cwadrangl Mewnol, sy'n agored i'r cyhoedd ar Ddiwrnod Graddio ac ar gyfer digwyddiadau arbennig.







Neuadd Prichard-Jones

Mae Neuadd Prichard-Jones, lle cynhelir y seremoni raddio heddiw, wedi'i henwi ar ôl Syr John Prichard-Jones, dilledydd o deulu cyffredin ar Ynys Môn a wnaeth ei ffortiwn yn Stryd Regent yn Llundain fel rheolwr gyfarwyddwr siopau mawr Dickens and Jones, a brynwyd gan Harrods yn 1914.



Cyfrannodd Syr Prichard-Jones £15,000 tuag at ei hadeiladu, a chafodd ei annog i gynorthwyo'r coleg yn y ffordd hon gan David Lloyd George, un o brif gefnogwyr y Brifysgol, a oedd yn Ganghellor y Trysorlys bryd hynny, cyn mynd ymlaen i ddod yn Brif Weinidog y DU.

Nid yw tu mewn y neuadd wedi newid llawer ers iddi gael ei hagor yn 1911. Mae'r tariannau sy'n addurno brig y muriau'n cynrychioli hen fwrdeistrefi Gogledd Cymru a gosodwyd yr organ bib yn dilyn cau eglwys leol y Tabernacl ddechrau'r 1970au.

Mae'r electroganwyllyron (siandeliers trydan) yn dal i hongian o'r nenfwd, ac mae'r waliau wedi'u gorchuddio â'r paneli wenscot gwreiddiol.

Caiff ei defnyddio'n aml gan y Brifysgol a'r gymuned, ac mae cenedlaethau lawer o fyfyrwyr wedi sefyll arholiadau, dawnsio a bod mewn seremonïau graddio yma. Mae gan y neuadd hefyd draddodiad hir o gynnal adloniant cerddorol i Ogledd Cymru, gyda pherfformwyr yn cynnwys Syr Bryn Terfel ac Aled Jones MBE.

Eich Seremoni Raddio

Dyma gyfle i ddathlu a myfyrio ar lwyddiannau ein myfyrwyr ac i alluogi cymuned y brifysgol i gydnabod eich cyflawniadau.

Gallwn yn awr gyda balchder mawr weld ein graddedigion yn cymryd eu camau cyffrous nesaf i'r byd, fel y mae llawer o rai eraill wedi'i wneud o'u blaen.

Pa un a ydych yn graddio, yn berthynas neu'n gyfaill i rywun sy'n graddio, rydym yn gobeithio y cewch ddiwrnod pleserus a fydd hefyd yn eich ysbrydoli.

Llongyfarchiadau!

Yr Orymdaith

Mae pob seremoni'n dechrau gyda gorymdaith. Fe'i harweinir gan Brif Farsial – sef uwch aelod o staff gweinyddol y Brifysgol. Ei waith yw gofalu bod y seremoni yn mynd yn ei blaen yn ddidrafferth. Yn dilyn y Prif Farsial yn yr orymdaith ceir sawl adran, pob un yn cael ei harwain gan Farsial(iaid), sydd hefyd yn swyddogion yn y Brifysgol:

Adran 1:

Staff academiaidd a phobl leol flaenllaw

Adran 2:

Penaethiaid Ysgolion a Phenaethiaid adrannau
Gwasanaethau Proffesiynol canolog

Adran 3:

Uwch swyddogion y Brifysgol, yn cynnwys y
Dirprwy Is-gangellorion a'r Cyflwynydd

Adran 4:

Cymrodyr er Anrhydedd a'u Cyflwynwyr

Adran 5:

Gorymdaith y Canghellor, yn gynnwys
yr Is-Ganghellor a'r Canghellor (neu ei
ddirprwy)

**Arweinir rhan olaf yr orymdaith, sef
gorymdaith y Canghellor, gan Gludydd
y Brysgyll, sydd hefyd yn aelod uwch o
staff gweinyddol y Brifysgol.**

Y Canghellor

Canghellor Prifysgol Bangor yw'r academydd a'r ffisegydd, yr Athro Syr Robin Williams.


Y Canghellor yw pennaeth seremonïol y brifysgol ac un o'i llysgenhadon amlycaf. Gweithiai gyda'r Is-Ganghellor ac uwch swyddogion eraill i hyrwyddo llwyddiannau'r brifysgol, gartref a thramor.

Graddiodd Syr Robin ym Mhrifysgol Bangor ac mae'n eiriolwr cryf dros natur ddwyieithog y brifysgol. Penodwyd i'r swydd ym mis Tachwedd 2022.

Mae Syr Robin yn awdurdod ym maes lled-ddargludyddion ac mae ei ymchwil wedi bod yn bwysig yn natblygiad electroneg ddigidol a'r newidiadau pellgyrhaeddol ym maes cyfrifiadura a chyfathrebu. Gan weithio'n agos gyda diwydiannau ledled y byd, datblygodd ddulliau newydd o astudio lled-ddargludyddion ac roedd yn un o'r rhai cyntaf i ddefnyddio ymbelydredd synchrotron i astudio arwynebau solidau.

Cafodd ei urddo'n farchog yn rhestr anrhydeddau pen-blwydd Brenhines Elizabeth II yn 2019 am wasanaethau i addysg uwch, ymchwil a'r Gymraeg, ac mae Syr Robin wedi gwasanaethu ar lawer o gyrff polisi a chyllido yn rhyngwladol ac yn y Deyrnas Unedig ac ar grwpiau cynghori gweinidogol ar ddatblygiad economaidd ac addysg yng Nghymru.

Mae'n gyn-gadeirydd Cyngor Ymgynghorol Gwyddoniaeth Cymru. Roedd yn aelod o Gyngor Ymgynghorol Arloesi Cymru ac yn un o gymrodwr sylfaenol Cymdeithas Ddysgedig Cymru. Dyfarnwyd Medal Wyddoniaeth a Thechnoleg yr Eisteddfod Genedlaethol 2022 i Syr Robin am ei gyfraniad gydol oes at wyddoniaeth.



Trefn y Gweithgareddau

Cerddoriaeth

Cyn i'r seremoni ddechrau bydd rhaglen o gerddoriaeth, gan orffen gyda cherddoriaeth yr orymdaith, sy'n dynodi dechrau'r seremoni. Cerddoriaeth yr orymdaith: John Stanley – 'Trumpet Voluntary'

Yr orymdaith

Gofynnir i'r gynulleidfa sefyll pan mae'r orymdaith yn dod i mewn i'r neuadd. Dyma ddechrau'r seremoni yn ffurfiol.

Hen Wlad Fy Nhadau (anthem genedlaethol Cymru)

Gweler y geiriau drosodd.

Rhagarweiniad

Mae'r seremoni'n agor gydag adroddiad gan fyfyrwr o'r Brifysgol o ddarn o gerdd, 'Y Coleg ar y Bryn' gan y diweddar Gwyn Thomas. Darllenir y darn yn Gymraeg a Saesneg. Roedd Gwyn Thomas, a fu farw yn 2016, yn gyn Athro y Gymraeg yn y Brifysgol, ac roedd yn Fardd Cenedlaethol Cymru o 2006 tan 2008.

Comisiynwyd y gerdd gan Ei Fawrhydi Brenin Charles III, neu Dywysog Cymru fel yr oedd ar y pryd, yn 2007 i ddathlu canmlwyddiant gosod carreg sylfaen Prif Adeilad y Celfyddydau.

Y penderfyniad

Mae'r Prif Gyflwynydd, sy'n academydd uwch, yn darllen y penderfyniad yn Gymraeg a Saesneg sy'n rhoi awdurdod i'r Is-Ganghellor i ddyfarnu graddau, ac mae hefyd yn cyflwyno pob grŵp o fyfyrwyr ar gyfer eu gwahanol raddau a diplomâu â'r geiriau: Anrhydeddus Is-Ganghellor, cyflwynaf i chi'r disgyblion hyn a enillodd radd (... teitl y radd ...) mewn (.. enw/enwau'r pwnc/pynciau a astudiwyd ...)



Cyflwyno'r myfyrwyr

Mae Cyflwynydd, Dirprwy Is-Ganghellor yr Adran berthnasol neu ei (d)dirprwy fel rheol, yn cyflwyno myfyrwyr i'r Is-Ganghellor trwy ddarllen eu henwau llawn. Mae pob myfyriwr yn ei dro yn croesi'r llwyfan i gael eu cyfarch gan yr Is-Ganghellor a'r Canghellor (neu ei ddirprwy).

Derbyn myfyrwyr i raddau

Bydd yr Is-Ganghellor yn derbyn grwpiau o fyfyrwyr i'w graddau yn ffurfiol trwy ddweud: Ar ran y Brifysgol rwy'n cadarnhau eich bod wedi derbyn gradd (... enw'r radd) a holl freiniau'r radd hon. Bydd y Canghellor (neu ei ddirprwy) yn cyfarch y graddedigion trwy ddweud: Llongyfarchiadau ar dderbyn eich gradd heddiw. Yna ailadroddir y drefn hon ar gyfer pob grŵp o fyfyrwyr. Cyflwynir y rhai a enwir yn eu grwpiau priodol yn y rhaglen i dderbyn eu graddau mewn absentia.

Egwyl

Tua hanner ffordd drwy'r seremoni, bydd egwyl gerddorol fer.

Gwobrau Addysg a Phrofiad Myfyrwyr

Mewn rhai seremonïau graddio bydd y Brifysgol yn cyflwyno Gwobr Addysg a Phrofiad Myfyrwyr

i aelod o staff y bernir ei fod/bod wedi gwneud cyfraniad arbennig i addysgu a/neu i gefnogi dysgu. Enwebir rhai i dderbyn Gwobrau Addysg a Phrofiad Myfyrwyr gan y rhai sydd yn y sefyllfa orau i farnu – y myfyrwyr eu hunain.

Cymrodoriaethau a Graddau er Anrhydedd

Tuag at y diwedd mewn rhai seremonïau graddio cyflwynir Cymrodoriaethau a Graddau er Anrhydedd gan y Brifysgol i unigolion sydd wedi gwneud cyfraniad nodedig yn eu gwahanol feysydd ac y mae'r Brifysgol yn dymuno eu hanrhydeddu. Cyflwynir y rhain gan yr Is-Ganghellor.

Anerchiad cloi

Bydd y seremoni yn cloi gydag anerchiad i'r graddedigion a'r gwesteion newydd.

Yr orymdaith yn gadael y neuadd

Gofynnir i'r gynulleidfa sefyll pan fydd cerddoriaeth yr orymdaith yn dechrau ac wrth i'r orymdaith adael y neuadd.

Cerddoriaeth yr Orymdaith:

F. Mendelssohn – 'War March of the Priests'

Hen Wlad Fy Nhadau

Mae hen wlad fy nhadau yn annwyl i mi,
Gwlad beirdd a chantorion, enwogion o fri;
Ei gwrol ryfelwyr, gwladgarwyr tra môd,
Tros ryddid gollasant eu gwaed.

Cytgan:

Gwlad, Gwlad, pleidiol wyf i'm gwlad,
Tra môr yn fur i'r bur hoff bau,
O bydded i'r heniaith barhau.

Hen Gymru fynyddig, paradwys y bardd;
Pob dyffryn, pob clogwyn, i'm golwg
sydd hardd

Trwy deimlad gwladgarol,
mor swynol yw si
Ei nentydd, afonydd, i fi.

Cytgan

Os treisiodd y gelyn fy ngwlad dan ei droed,
Mae hen iaith y Cymry mor fyw ag erioed,
Ni luddiwyd yr awen gan erchyll law brad,
Na thelyn berseiniol fy ngwlad.

Cytgan

Anthem Epig a'i Tharddiad



Cyfansoddwyd tôn a geiriau'r gân a fabwysiadwyd yn ddiweddarach fel ein hanthem genedlaethol ym mis Ionawr 1856. Roedd yn ganlyniad cydweithio rhwng tad a mab o Bontypridd: Evan James, awdur y geiriau, a'i fab James James, cyfansoddwr y dôn.

Perfformiwyd y gân am y tro cyntaf yn ysgoldy Capel Tabor (Eglwys Bresbyteraidd Cymru), Maesteg, gan Elisabeth John, Pontypridd, ac yn fuan, roedd y gân yn boblogaidd yn ardal Pontypridd.

Daeth yn fwy adnabyddus ar ôl Eisteddfod Llangollen 1858. Fe'i cyhoeddwyd mewn casgliad poblogaidd o ganeuon Cymreig, a daeth yn ffefryn mewn eisteddfodau ac achlysuron gwladgarol eraill. Yn raddol daeth Hen Wlad Fy Nhadau yn anthem genedlaethol Cymru - er nad oes ganddi statws swyddogol hyd heddiw.



Y Brysgyll

Y Brysgyll yw symbol awdurdod y Brifysgol ac yn y seremoni mae'n mynd o flaen yr Is-Ganghellor bob amser.

Comisiynwyd y Brysgyll gan Gymdeithas y Cyn-fyfyrrwyr i goffáu canmlwyddiant y Brifysgol ym 1984. Ar frig y Brysgyll ceir tarian gydag arfbais y Brifysgol arni, a gwnaed ei ben o lechfaen Bethesda. Mae hyn i gofio haelioni'r chwarelwyr lleol a gyfrannodd ran o'u cyflogau wythnosol yn nechrau'r 1880au tuag at sefydlu'r Brifysgol.

Mae'r ddwy ffon eboni sy'n cael eu cario gan y marsialiaid yn rhodd gan y pumed Arglwydd Kenyon a gwblhaodd 36 mlynedd o wasanaeth fel Llywydd y Brifysgol yn 1981. Ar ben y ffyn ceir tariannau ac arnynt arfbeisiau'r Brifysgol a'r teulu Kenyon.

Graddau **er Anrhydedd**



Judith Batchelar OBE – Doethur er Anrhydedd mewn Gwyddoniaeth (DSc er Anrhydedd)

Arweinydd yn y diwydiant bwyd a hyrwyddwr cynaliadwyedd – am gyfraniad at ysgolheictod, arloesi ac arweinyddiaeth ym meysydd bwyd, ffermio a chynaliadwyedd

Mae Judith Batchelar OBE yn enw blaenllaw ym myd bwyd, ffermio a chynaliadwyedd; mae hi'n fiocemegydd a maethegydd sydd wedi treulio dros 40 mlynedd yn trawsnewid diwydiant bwyd y Deyrnas Unedig. Ar ôl dechrau ei gyrfa ym maes cynhyrchion fferyllol a dysgu, bu'n gweithio i Bass, Mars a Marks & Spencer, cyn ymuno â Sainsbury's fel cyfarwyddwr brand (2004-2021), gan yrru arloesi, ansawdd a chynaliadwyedd. Mae Judith wedi ymrwymo'n llwyr i gynnydd amgylcheddol a chymdeithasol, ac mae hi'n ymwneud â nifer o sefydliadau, gan gynnwys UKCEH, Defra, Royal Botanic Gardens Kew, the British Nutrition Foundation, The Nature Conservancy, ac mae hi'n gadeirydd y bwrdd cynghori Healthy and Sustainable Places Data Services ym Mhrifysgol Leeds. Roedd Judith yn Brif Feirniad yng ngwobr hyfforddiant arloesedd ac arweinyddiaeth Prifysgol Bangor ym mis Ebrill 2023. Mae hi'n gymrawd yr Institute of Food Science and Technology a'r Royal Society of Arts a dyfarnwyd OBE iddi yn 2015 am wasanaethau i ffermio a'r diwydiant bwyd.



Benjamin Pritchard PLY – Doethur er Anrhydedd mewn Gwyddoniaeth (DSc er Anrhydedd)

Rhwyfwr Paralympaidd a chyn-fyfyriwr Prifysgol Bangor – i gydnabod cyflawniadau gwych a thaith ysbrydoledig

Mae Benjamin Pritchard yn athletwr ysbrydoledig ac yn gyn-fyfyriwr Prifysgol Bangor, graddiodd yn 2013 gydag LLB yn y Gyfraith cyn mynd ymlaen i gael llwyddiant mawr mewn rhwyfo. Wedi ei eni a'i fagu yn y Mwmbwls, de Cymru, roedd Benjamin yn feiciwr a thriathletwr cyn i ddamwain feicio yn 2016 ei adael wedi ei barlysu o'r canol i lawr. Yn ystod cyfnod adsefydlu yn Ysbyty Stoke Mandeville, darganfu rhwyfo a chododd yn gyflym trwy'r rhengoedd, gan ymuno â'r GB Para Rowing Team yn 2017. Gwnaeth Benjamin ei ymddangosiad rhyngwladol cyntaf yn 2019, ac mae wedi cynrychioli Prydain Fawr mewn sawl pencampwriaeth ers hynny, gan ddod yn bencampwr Ewrop, yn ddeiliad recordiau byd ac Ewropeaidd, ac yn bencampwr y byd. Uchafbwynt penodol oedd ennill medal aur am sgwlio sengl dynion PR1 yng Ngemau Paralympaidd Paris 2024, a gosod record Paralympaidd newydd. Mae ei benderfyniad, ei wydnwch a'i ragoriaeth fel athletwr yn parhau i ysbrydoli athletwyr ledled y Deyrnas Unedig.

Mae ein Cymrodoriaethau a'n Graddau er Anrhydedd yn ddyfarniadau mawr eu bri a roddwn i unigolion nodedig sydd â chysylltiad â'r Brifysgol, neu â Chymru, ac sydd wedi gwneud cyfraniad eithriadol yn eu gwahanol feysydd.



Mr David Jones FRCS, RCS Ed (Orth) - Doethur er Anrhydedd mewn Gwyddoniaeth (DSc er Anrhydedd)

Llawfeddyg orthopedig ac arweinydd meddygol – am gyfraniad at wasanaeth cyhoeddus ym maes iechyd

Mae Mr David Jones FRCS, FRCS Ed (Orth) yn llawfeddyg orthopedig nodedig ac mae wedi gweithio trwy gydol ei yrfa i ddatblygu gofal orthopedig a thrawma yn gyffredinol ac orthopedig plant yn benodol. Daw o Iwerddon yn wreiddiol ac astudiodd feddygaeth ym Mhrifysgol Manceinion. Cafodd ei hyfforddiant orthopedig yn Ysbyty Sant Bartholomew, Llundain cyn symud i Fangor, lle arweiniodd y tîm a sefydlodd yr Uned Ddamweiniau arloesol yn Ysbyty Gwynedd, model a gydnabuwyd yn ddiweddarach fel y safon aur ledled y Deyrnas Unedig. Aeth ymlaen i weithio fel llawfeddyg orthopedig ymgynghorol yn y Great Ormond Street Hospital for Children. Mae'n gyn-Athro Hunterian ac yn aelod o The Royal College of Surgeons of England, yn Llywydd y British Orthopaedic Association ac yn llywydd Cymdeithas Orthopedig Cymru, mae David wedi cyhoeddi'n eang, wedi darlithio'n rhyngwladol, ac er ei fod wedi ymddeol bellach, mae'n parhau i gyfrannu at addysg feddygol, hanes meddygaeth a gwaith elusennol sy'n ymwneud â phlant.



Credyd llun:
Richard Unsworth

Dr Leanne Cullen-Unsworth - Doethur er Anrhydedd mewn Gwyddoniaeth (DSc er Anrhydedd)

Gwyddonydd y môr ac arweinydd cadwraeth – am gyfraniad at ysgolheictod ac arloesi

Mae Dr Leanne Cullen-Unsworth yn wyddonydd, cadwraethwr ac arweinydd ysbrydoledig, graddiodd o Brifysgol Bangor gydag MSc mewn Gwarchod yr Amgylchedd (2001). Cafodd ei henwi'n un o 100 o Ferched 2023 y BBC, mae hi'n llais arloesol ym maes cadwraeth y môr a chynaliadwyedd. Fel Prif Swyddog Gweithredol project Seagrass, Leanne sy'n arwain ymdrechion byd-eang i amddiffyn ac adfer dolydd morwellt - ecosystemau hanfodol sy'n cefnogi pysgodfeydd, bioamrywiaeth a gwynwch hinsawdd. Mae ganddi dros 20 mlynedd o brofiad o ymchwil rhyngddisgyblaethol, mae ei gwaith yn pontio gwyddorau amgylcheddol, gwyddorau cymdeithasol a gwyddorau economaidd i hyrwyddo cadwraeth sy'n cynnwys pobl fel rhan o'r ecosystem. Mae Leanne yn eiriolwr brwd dros natur a chenedlaethau'r dyfodol, mae hi'n parhau i godi ymwybyddiaeth fyd-eang o gadwraeth morwellt a'i gyfraniad hanfodol at ddiogelu ein planed.

Llongyfarchiadau, rydych wedi graddio!

Rydych yn awr yn ymuno â'n cymuned amrywiol o gyn-fyfyrrwyr sy'n rhagori yn eu gyrfaedd gyda'r sgiliau a'r gefnogaeth y maent wedi'u derbyn ym Mangor.

Rydych yn rhan o rwydwaith cyn-fyfyrrwyr Prifysgol Bangor, felly cadwch mewn cysylltiad â ni ar ôl i chi raddio.

Trwy gynnal cysylltiadau gydol oes gyda chyn fyfyrwyr, rydym wedi ymrwymo i hyrwyddo eich llwyddiannau a hwyluso cyswllt rhwng ffrindiau ac adrannau, a chefnogi rhwydweithiau newydd.

Mae ein cymuned o raddedigion yn pontio cenedlaethau a chyfandiroedd gyda chyn fyfyrwyr ledled y byd yn cyfarfod a chynorthwyo ei gilydd – heb iddynt erioed gyfarfod yn ystod eu bywydau fel myfyrwyr yn aml. Rydych yn awr yn aelod o'r rhwydwaith gwerthfawr hwn!

Er mwyn sicrhau eich bod yn rhan o'n rhwydwaith o gyn-fyfyrrwyr, cofiwch sicrhau bod eich manylion cyswllt cyfredol gennym drwy lenwi ein ffurflen ddiweddar ar lein a dewis derbyn negeseuon at gyn-fyfyrrwyr.

Fel y mae llawer o'n cyn-fyfyrrwyr yn dewis gwneud, efallai yr hoffech gyfrannu at Gronfa Bangor i nodi'r graddio heddiw. Mae rhoddion gan gyn-fyfyrrwyr yn helpu gwneud gwahaniaeth i brofiad myfyrwyr yn y brifysgol. Ceir rhagor o fanylion yma: bangor.ac.uk/cy/cefnogi/cronfa-bangor



Sganiwch i optio i mewn i gyfathrebiadau cyn-fyfyrrwyr.

Nid yw'n hwyl fawr!

Eich cymuned o gyn-fyfyrrwyr

Fel cyn-fyfyriwr o Fangor, gallwch elwa ar amrywiaeth o wasanaethau, gan gynnwys:

- E-newyddion Cyn-fyfyrrwyr: rydym yn anfon e-newyddlenni misol i roi'r newyddion diweddaraf i chi o'r Brifysgol, gan gynnwys manylion am aduniadau a digwyddiadau a gwybodaeth am yr ymchwil a'r gweithgareddau sy'n digwydd yn ein hysgolion a'n colegau.
- Mynediad i'r llyfrgell: gall cyn-fyfyrrwyr barhau i gael mynediad i lyfrgelloedd ardderchog y Brifysgol gyda Cherdyn Llyfrgell Cyn-fyfyriwr.
- Gwybodaeth am rwydweithiau a grwpiau cyn-fyfyrrwyr, gan gynnwys grwpiau ar y cyfryngau cymdeithasol fel LinkedIn a Facebook.

I ble fydd eich taith yn mynd â chi?

Cadwch mewn cysylltiad â'n cymuned cyn-fyfyrrwyr a rhannwch eich stori.

bangor.ac.uk/cy/alumni
alumni@bangor.ac.uk

Ehangwch eich dealltwriaeth drwy barhau ar eich siwrne addysg uwch gyda ni

Astudiaethau Ôl-radd Hyfforddedig

Mae ein cyrsiau ôl-radd hyfforddedig yn cynnig mynediad i arbenigwyr a chyfleusterau heb eu hail, i'ch helpu chi ddatblygu sgiliau ac ennill cymwysterau.

Gallai myfyrwyr a raddiodd ym Mangor fod yn gymwys i dderbyn gostyngiad o hyd at 20% ar gyrsiau ôl-radd hyfforddedig.

Rhaglenni ymchwil

Datblygwch eich sgiliau ymchwil ymhlith cyfoedion a darlithwyr sy'n rhannu eich brwdfrydedd dros ehangu dealltwriaeth y byd am eich pwnc.



Sganiwch i ddysgu mwy am ein gostyngiad ôl-radd

Llwyddiant Myfyrwyr:

Gwasanaeth Gyrfaoedd a Chyflogadwyedd

A oeddech yn gwybod y gall graddedigion Prifysgol Bangor ddefnyddio Gwasanaeth Sgiliau a Chyflogadwyedd y brifysgol am dair blynedd ar ôl graddio? Gall mynediad at gyngor a gwybodaeth am yrfaedd fod yr un mor bwysig i chi ar ôl graddio â phan oeddech yn fyfyrwr.

Mae graddio'n garreg filltir gyffrous a phwysig i bawb - bydd y cyfnod ar ôl graddio'n llawn newid, ond gall fod yn heriol hefyd.

Rydym wedi ymrwmo i roi cymorth i chi lwyddo wrth ddechrau eich gyrfa ac nid oes ots ble rydych chi ar y daith. Llwyddiant Myfyrwyr: Mae'r Gwasanaeth Gyrfaoedd a Chyflogadwyedd yn ymdrin â chynllunio gyrfa, chwilio am swydd a sgiliau ymgeisio, yn ogystal ag amrywiaeth o bynciau eraill i'ch helpu datblygu eich cyflogadwyedd fel un o raddedigion Bangor, trwy'r canlynol:

- Gweithdai a gweminarau
- Mynediad at amrywiaeth eang o adnoddau gwahanol gan gynnwys y Llwybr Llwyddiant Gyrfa
- Sesiynau cefnogi gyrfaoedd galw heibio ar-lein

Gall graddedigion Prifysgol Bangor hefyd fanteisio ar eu cyfrif gyrfaoedd a chyflogadwyedd ar-lein (trwy ein porth ar-lein CyswlltGyrfa), sy'n cynnig lluo o offer, adnoddau a chyfleoedd.

Fel un o raddedigion Prifysgol Bangor, y cyfan sy'n rhaid i chi ei wneud i barhau / ailgysylltu â'n gwasanaeth yw mewngofnodi i'ch cyfrif personol ar CyswlltGyrfa Bangor (careerconnect.bangor.ac.uk) - byddwch yn cael gwahoddiad i wneud hyn yn syth ar ôl graddio. Mewngofnodwch gan ddefnyddio eich cyfeiriad e-bost personol a bydd eich cyfrif myfyriwr yn troi'n gyfrif newydd.

"Rhoddodd astudio ym Mhrifysgol Bangor, ynghyd â gweithdai a hyfforddiant cyflogadwyedd, yr hyder a'r sgiliau i mi lwyddo. Gwnaeth fy nghwrs, â'r gefnogaeth gan y Tîm Cyflogadwyedd, fy mharatoi'n dechnegol ac yn broffesiynol. Helpodd y cyfleoedd hyn fi i ddechrau gweithio fel cynorthwydd cyflogadwyedd a symud ymlaen i fod yn rheolwr project. Cefais fwy na gradd gan Fangor; cefais gymorth gyda fy ngyrfa."

Comfort Ugbabe

Dadansoddwr deallusrwydd busnes ym Mhrifysgol Caerfaddon

Astudiodd: MSc Dadansoddeg Data Busnes (2024)





PRIFYSGOL
BANGOR
UNIVERSITY

Dy Ddyfodol
ar Waith

